

## Leviticus Levi ai kauh

Wei bukana wavana Leviticus, aubaina Levi ana dam e bababaniei. Tau i pirisi pulo tauapuna i vovoagui. Ma BADA ana Numa Gara Vivivireina i paipaini.

### *Pulo taputapuna apuna*

<sup>1</sup> BADA au Numa gara Vivivireina ma Moses i kwatuei ma i riwei i pa,

<sup>2</sup> “Wei au pariverena pulo apunana aubaina. Mai Israel ma riwei ma pa, ‘Aiai da BADA awarina ġamoġamo e apuapui, lamna bulumakau tagogi bo sipu bo gote i ġamoġamoi ina neiai ana pulo.

<sup>3</sup> —‘Mepa da ġamoġamo taputapuna e apuapui am pulo, ma inanai da ġamoġamo orotona aiaina ma eġa ana apoapoe aiwai. Ma neiai Numa gara Vivivireina ana au anirui, da BADA ina vianinem.’

<sup>4</sup> Ma uram ġamoġamona au kolana ma terei, wei e vivimataira da ġamoġamo i raviepa iam da ina irage am ġo’apoapoe ina oġa-tawanei.

<sup>5</sup> Ma bulumakau BADA au naona ma viraġeni, ma pirisi Aaron natunatuna tara, ina neiai da pulo aniapuna au adana ina voiwaiwaġa-naiei.

<sup>6</sup> Anina ma Ġamoġamo ma opai ma ma api.

<sup>7</sup> Ma Aaron natunatuna, ai ina viviri pulo aniapuna au tepana.

<sup>8-9</sup> Tau i sia apiapina ai araratana au tepana ina terei da ina arai, kolana da monamona maiteni. Wate amoamo da ganigani ma sia aei wairei ina oġai, ma pirisi siana anatapuna ina apui. Wei

pulona apuapunana lamna ḡabuna aiaina BADA ina vinuaiaini.”

*Wate God Moses i riwei da rava sipu bo gote, gabubu bo bunebune ita puloei me pulo e apuapui nanarena. Tauna wate Moses i riwei da menanare wei ina puloana-nei.*

### 3

#### *Vieḡualau pulona*

<sup>1</sup> BADA Moses awarina i babani i pa, “Aiai da nuauba amna aubaina ana pulo bulumakau e apuapui, ma inana-kauei da burumakauna orotona bo wavinena, aiaina ma eḡa ana apoapoe aiwai.

<sup>2</sup> Ma urana ḡamoḡamo au kolana ina terei ma ina viraḡeni Numa Gara Vivivireina ana au anirui. Ma pirisi Aaron natunatuna tara pulo aniapuna au adana ina voiwaiwaḡa-naiei.

<sup>3-4</sup> Ma amoamo monamona ava ma kaina monamona ma ganigani ana monamonana, pirisi ina verei da ina apui nuauba pulona.

<sup>5</sup> Ma Aaron natunatuna wei monamonai sia taputapuna e ararai au tepana ina terei ma ina apu-tagogiei, pulo aniapuna au tepana. Wei amgogona pulona ma ḡabuna i ai kua BADA awarina.”

*Ma ḡamoḡamo taupuloina ana numa ravai maiteni ma ai rava ḡelau i sia mae-terenai e aniani. Wei lamna BADA ana babani bulumakau aubaina ma riwana tagogina sipu ma gote aubaii amgogona pulona.*

### 13

#### *Opi doriaana ana tarawatu*

<sup>1</sup> BADA Moses ma Aaron i riwei i pa,

<sup>2</sup> “Mepa da aiai kero bo paramaitua i vaia bo opina i lebara ma e notanotai da wei kerona e viviopidoriana, lamna ana rava tauna ina naiei pirisi Aaron bo natuna tagogi awarina.

<sup>3</sup> Pirisi kero vioana ina inanai. Mepa da apara au kero e vivimairiana i arapaira ma dogona i ġaira lamna opidoriana. Ma pirisi ina riwa da tauna eġa aiaina BADA au matana.

<sup>45</sup> —Rava aiai opidoriana i vaia, tauna gara wanasikasikana ina oteni, aparana eġa ina jinai ma naona ina purui ma ina kwatu ina pa, ‘Tau eġa aiiau! Eġa ona nei au ririvau!’

<sup>46</sup> Maranai doriana awarina e mamae lamna tauna anina miramirana, Tauna ainelana ina mae au tano.”

## 17

### *Tara ana tarawatu*

<sup>10</sup> ✧ Aiai Israelieina bo jentail maiteni o mamae, sia taratarana e aniani, BADA tauna ina mae-puputei ma ana rava awariei ina bori-tawanei.

<sup>11</sup> Aiwai anatapui da lawalawaii ai lawana au tarai e mamae ma lamna aubaina BADA i riwa da tara pulo au aniapuna ona voiwaiwaġi da rava ai ġo’apoapoe ina vaitawanei. Tara lamna lawana, ma lamnei ġo’apoapoe e vaivai-tawanei.

## 18

### *Viawawana ana tarawatu*

<sup>1</sup> BADA Moses i riwei i pa,

---

✧ **17:10:** Gen 9:4

<sup>2</sup> “Mai Israel awari ma babani ma ma riwei, ‘TAU BADA ami God.’

<sup>3</sup> Mai Egypt ai kauhā eḡa ona ḡovaivaitei, Wariāḡa kampa o mae, marina a taratara-vainanaiemi au Canaan ma ai kauhā eḡa ona ḡovaivaitei. Eḡa ai lawana ona votaḡotaḡoi.

<sup>4</sup> Taumi au tarawatu ona voteletelei ma riwau ona votaḡotaḡoi. Tau BADA ami God.

<sup>5</sup> Mepa da au tarawatu ma riwau ona voteletelei taumi lawana ona nelaḡai. TAU BADA a riwa.”

<sup>6</sup> TAU BADA wei au babani bagibagii a vereveremi, “Eḡa aiai novuna bo vareina ina viawawanei.

<sup>19</sup> —Maranai wavine nawaravi i vunui tauna miramirana, eḡa maiteni ma viawawana.

<sup>20</sup> —Eḡa oroto ḡelauna awana maiteni ma viawawana, lamna tam u vimira-melem.

<sup>21</sup> —Natunatumi eḡa ona puloei god Molek\* awarina, aubaina TAU BADA ma vinimala e neinei ai awariu.

<sup>22</sup> —Eḡa aiai orotona, oroto ḡelauna ina viawawanei, me oroto waivine e viawawanei, wei lamna ḡo’apoapoe kaukauana God au matana.

<sup>23</sup> ☆—Eḡa aiai orotona ḡamoḡamo ina viawawanei bo wavine ina verena-melei da ḡamoḡamo ina viawawanei. Mepa da wei u kauēi tam u vimira-melem.

<sup>24</sup> —Eḡa wei kauai ona kauēi da ina vimiramiraimi. Dam au Canaan maemaēi anatapui wei kauai i kauēi ma i vimira-melei. Lamna aubaina ana viāḡaḡana-opunei ma taumi ona rui.”

---

\* **18:21:** Molek lamna mai Ammon ai god ☆ **18:23:** Exo 22:19

## 19

### *Apoapoe terevai-jijimanina riwai*

<sup>1</sup> Ma BADA Moses i riwei i pa,

<sup>2</sup> “Dam Israel anapui ma tuarui ma ma riwei, ‘Taumi lawana vivivireina ona maeni. Aubaina Tau BADA ami God vivivireiu.’

<sup>17</sup> —Eġa oram ina raviapiai kua apoapoena ravana awarina, wate maiteni ona kiala da kua ona tere-vaijijimani, da eġa ġo’apoapoe ona kauei.

<sup>18</sup> ☆—Eġa ma raubiwa am rava awarii, eġa aiai ma ġoaġaiei, wate rava turam nuanuam ina vaia me tam nuanuam e vaivai-melei. TAU BADA.”

## 20

### *Konaġa riwana*

<sup>6</sup> Aiai ravana i ġoei da kua anoi ita aramanei, lamna Tau ina vibaġaiu. Eġa vinuaterena aubaina ina nae konakonaġa awarii ina bababani. Mepa da aiai wei i kauei, nai ravana ana mae-puputei, ma au rava awariei ana viopuni.

## 24

### *Vimaimaia riwana*

<sup>19</sup> Mepa da aiai turana i vikeroi, aiwai i kaukaueia awarina nanare ina kauei.

<sup>20</sup> Mepa da gelama i viaigai, gelamina tagogi ina wanagai, mepa da mata tagogi i viapoapoeni, matana tagogi ina apoapoei. Mepa da ivo tagogi

---

☆ **19:18:** Mrk 12:31

i viaigai, ivona tagogi ina wanagai. Aiwai kerona rava ġelauna i verei, tauna nanare ina kero.

<sup>21</sup> Aiai ravana ġamoġamo i viraġeni ina vimaiei, wate aiai da rava i viraġeni, tauna ina iraġe.

<sup>22</sup> Wei tarawatuna taumi anatapumi aubaimi, mai Israel ma dobu ġela ravai, aubaii TAU BADA ami God.

**Wedau Mark**  
**The Gospel of Mark in the Wedau Language of Papua**  
**New Guinea**  
**Buk Mak long tokples Wedau long Niugini**

copyright © 2010 Wycliffe Bible Translators, Inc.

Language: Wedau

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-08-30

---

PDF generated using Haiola and XeLaTeX on 18 Apr 2025 from source files dated 31 Aug 2023

aa19f3e3-98fb-51fa-9c53-3906edc75f11